

PROXECTO REGULAMENTO ELECTORAL FEGAN

Para a elección a membros da Asemblea Xeral, Presidente e Comisión Delegada da Federación Galega de Natación.

Santiago de Compostela, -- de setembro de 2014.

Artigo 1. Obxecto da normativa

En aplicación do disposto na Lei 3/2012, do 2 de abril, do deporte de Galicia, e na Orde do 8 de setembro de 2010, da Consellería de Presidencia, Administracións Públicas e Xustiza, polo que se establecen os criterios para a elaboración de regulamentos e a realización dos procesos electorais nas Federacións Deportivas Galegas, confeccionase a seguinte normativa que regula o proceso de elección dos órganos de goberno: Asemblea xeral, Presidente e Comisión Delegada, da Federación Galega de Natación, con representatividade durante o período 2014 a 2018.

Artigo 2. Celebración de eleccións

A Federación Galega de Natación procederá á elección da súa Asemblea Xeral, Presidente e Comisión Delegada no ano 2014. O calendario electoral será o indicado no anexo I. Os sobres e papeletas serán os establecidos no anexo II. Establécese como horario de apertura ao público da sede federativa o seguinte: 16:00 a 20:00 horas.

Artigo 3. Regulamento electoral provisional e definitivo

Unha vez aprobado o regulamento electoral por parte da Asemblea Xeral da Federación Galega de Natación será remitido á Secretaría Xeral para o Deporte da Xunta de Galicia, que resolverá, no prazo máximo de 10 días hábiles dende a entrada do documento no seu rexistro, sobre a aprobación do mesmo ou a súa devolución para a corrección de posibles deficiencias.

Transcorridos estes sen que recaia resolución algunha entenderase aprobado o regulamento. No caso de ser necesaria a emenda de deficiencias, indicaranse as mesmas e se concederán dez días hábiles para proceder a dita corrección.

Solicítase á Asemblea Xeral da Federación Galega de Natación, no caso que houbera que reparar algunha deficiencia no mesmo regulamento electoral, que delegue e autorice á Xunta Directiva a facer os cambios necesarios, sen necesidade dun novo sometemento á aprobación da asemblea xeral. Unha vez feitas estas modificacións, o novo regulamento presentarase á Secretaría xeral para o deporte para a súa ratificación definitiva.

Artigo 4. Censo electoral

1. O censo electoral (ANEXO III) incluírá aos deportistas, técnicos/adestradores, xuíces/árbitros e entidades deportivas inscritas na federación e no Rexistro de Asociacións deportivas e deportistas de Galicia, que reúnan os requisitos para ser electores e elixibles, de acordo co establecido no artigo 8º do presente regulamento. Inclúiranse os seguintes datos:

- a) Para os/as deportistas, adestradores e xuíces/árbitros: nome, apelidos, número de licenza federativa, número do Documento nacional de identidade ou da tarxeta de residencia e domicilio a efectos de notificación. O domicilio reflectido por defecto para o estamento de deportistas será o do club ao que pertencen, ou no seu caso tamén respecto do estamento de xuíces/árbitros, o que a estes efectos indiquen a Federación. No período de reclamacións ao censo provisional poderase solicitar o cambio de domicilio.
- b) Para as entidades deportivas: nome, denominación ou razón social e número de inscrición no Rexistro de

Asociacións deportivas e deportistas de Galicia, así como o nome e apelidos do presidente e secretario. Os datos dos clubs deberán ser plenamente coincidentes cos datos contidos no Rexistro de Asociacións Deportivas e Deportistas de Galicia, tendo a Federación a obriga de cotexar ditos datos. No caso de discrepancias entre os datos que se achan no rexistro da federación e os que se achan no Rexistro de Asociacións Deportivas e Deportistas de Galicia, establecerase un prazo de 10 días para a súa corrección.

2. O censo electoral provisional publicarase xunto coa convocatoria. A exposición pública do mesmo deberá facerse por un prazo mínimo de 10 días hábiles, dentro do cal se poderán presentar as reclamacións que se estimen oportunas ante a Xunta Electoral, resolvéndose por esta no prazo máximo de 5 días hábiles e considerándose o silencio da xunta en sentido estimatorio da petición realizada. Dita exposición farase no taboleiro de anuncios da Federación Galega de Natación, así como na páxina web www.fegan.org.

3. O censo será considerado definitivo se non se presenta reclamación algunha, ou cando de presentarse, sexa resolta pola xunta electoral ou, se é o caso, polo Comité Galego de Xustiza Deportiva. Deberán aplicarse as mesmas garantías de difusión e publicidade que as previstas no número 2 deste artigo para o censo provisional.

4. Os datos contidos no censo electoral gozarán da protección do previsto na LO 15/1999, do 13 de decembro, de protección de datos de carácter persoal. En todo caso o tratamento e publicación dos datos contidos no censo terá por única finalidade garantir o exercicio polos electores do seu dereito de sufraxio, estando prohibida a súa cesión ou utilización para unha finalidade distinta a aquela.

Artigo 5. Xunta electoral

1. O mesmo día da convocatoria de eleccións, constituirase a Xunta Electoral.

2. A xunta electoral estará integrada por tres membros titulares e tres suplentes, elixidos por sorteo na asemblea xeral, entre as persoas que presenten a súa candidatura a membros da xunta electoral. As candidaturas deberanse presentar na mesma asemblea na que se celebre a súa elección, podendo estar os candidatos presentes na mesma.

Os membros da xunta deberán reunir os requisitos seguintes:

- a) Ser maior de 18 anos.
- b) Ter o título de bacharelato superior ou equivalente.
- c) Non presentarse como candidato a membro da asemblea xeral.
- d) Non ter relación contractual ou profesional coa Federación Galega de Natación
- e) Non estar cumprindo sanción disciplinaria firme ou sanción administrativa firme en materia deportiva que comporte sanción de inhabilitación para ocupar cargos nunha organización deportiva.

3. No caso de non presentación de candidatos a membros da xunta electoral, o presidente da federación proporalle á asemblea os membros necesarios para completar a mesma, os cales deberán así mesmo reunir os requisitos definidos no apartado anterior.

4. Actuará como presidente e secretario da xunta electoral o membro de maior e menor idade, respectivamente. As decisións da xunta electoral tomaranse por maioría de votos. A asistencia á xunta electoral é obrigatoria salvo causa xustificada.

5. Funcións da xunta electoral:

- a) Velar polo axustamento a dereito do proceso electoral dos órganos de goberno e representación federativos.
- b) Organizar os procesos das eleccións para a asemblea xeral e presidente da federación, segundo o disposto neste regulamento electoral.
- c) Designar as mesas electorais de conformidade co previsto neste regulamento electoral.
- d) Aprobar as candidaturas que reúnan os requisitos esixidos, así como o resto da documentación electoral.

- e) Garantir a exposición de censos, candidaturas e outros documentos segundo se estableza neste regulamento electoral.
- f) Coñecer e pronunciarse sobre os recursos que se presenten.
- g) Custodiar a documentación correspondente a todo o proceso electoral, excepto o que non lle corresponda do procedemento do voto por correo, ata a súa finalización.
- h) En xeral, cantas facultades lle sexan atribuídas por este regulamento electoral.

Artigo 6. Mesa electoral: composición e competencias.

1. En cada circunscrición electoral constituirase unha única mesa electoral para a elección dos membros da asemblea no día fixado. O horario de apertura da mesa será o seguinte: 16:00 a 20:00 horas. Ubicaranse nos seguintes lugares:

- A Coruña: sede da FEDGAN (Avda Glasgow, 13 15008 A Coruña). Mesa de circunscrición autonómica para os estamentos de árbitros/xuices e adestradores, e de circunscrición provincial para o estamento de deportistas.
- Lugo: Club Fluvial (c/ Fermín Rivera s/n 27297 Lugo) Mesa de circunscrición provincial para o estamento de deportistas.
- Ourense: Pabellón (Pardo de Cela, 2 27400 Ourense) Mesa de circunscrición provincial para o estamento de deportistas.
- Pontevedra: CGTD (Padre Fernando Olmedo, 1 36003 Pontevedra) Mesa de circunscrición provincial para o estamento de deportistas.

As mesas electorais estarán compostas por tres membros titulares (un presidente, un secretario e un vogal) e tres suplentes destes, elixidos por sorteo pola xunta electoral entre os integrantes do censo definitivo. Dito sorteo efectuarase na sede da FEDGAN o día de publicación de censos definitivos ás 12:00 h. Serán presidente e secretario os membros de maior e menor idade respectivamente. A asistencia á mesa electoral é obrigatoria salvo causa xustificada que deberá ser autorizada pola xunta electoral.

Así mesmo, para a mesa electoral, os candidatos poden nomear interventores, entre quen desempeñe a condición de elector, que serán identificados ante a xunta electoral con antelación non inferior a 24 horas do día de celebración das respectivas votacións. A xunta electoral expedirá a correspondente acreditación.

Os interventores poderán participar nas deliberacións da mesa, con voz pero sen voto, así como solicitar á mesma certificacións e formular ante ela protestas, todo iso sen prexuízo da lexitimación que lles corresponde conforme aos artigos 18 e 19 deste regulamento.

2. Son competencias da mesa electoral:

- Comprobar a identidade dos votantes.
- Recoller a papeleta de voto e depositala na urna pechada e preparada aos efectos.
- Proceder ao recuento de votos.
- Levantar acta dos votos emitidos, resultados, e calquera outras incidencias. así como das incidencias e reclamacións se as houber, facendo constar o número de votos obtidos por cada candidato.

3. A acta será subscrita por todos os membros da mesa electoral, así como polos interventores, se os houber, remitíndose posteriormente á xunta electoral, que deberá garantir a súa exposición pública mediante a publicación no taboleiro de anuncios e na páxina web www.fegan.org

4. Cando proceda a elección de presidente constituirase a mesa electoral con dous membros que serán respectivamente o de maior e menor idade da asemblea. O primeiro actuará como presidente e o segundo como secretario. Así mesmo, e ata que conclúa a elección de presidente, exercerán funcións de presidente e secretario da asemblea.

5. Os gastos de desprazamentos dos membros das mesas electorais serán sufragados pola Federación Galega de Natación.

Artigo 7. Convocatoria de eleccións

1. A convocatoria das eleccións será feita polo Presidente da Federación Galega de Natación o día 17 de outubro do 2014, conforme a este regulamento electoral, aprobado pola Secretaría Xeral para o deporte.

2. Simultaneamente á convocatoria de eleccións, a xunta directiva disolverase, constituíndose en comisión xestora que non poderá realizar mais que actos de mera administración e trámite.

3. A convocatoria de eleccións publicarase no taboleiro de anuncios da sede da federación e nas delegacións, así como na páxina web www.fegan.org. A notificación da convocatoria de eleccións conterá cantos datos se precisen para o correcto desenvolvemento do proceso electoral, e sinaladamente:

- Regulamento electoral.
- Calendario electoral con indicación do lugar, data e hora de celebración dos actos propios do proceso electoral.
- Lugar de consulta dos censos electorais.
- Modelos oficiais de sobres e papeletas.
- Composición e sede da xunta electoral da Federación.

4. Cun prazo de antelación mínimo de cinco días hábiles dende a data da convocatoria, esta haberá de ser notificada, a través de medio que permita asegurar a súa recepción, cando menos, ás entidades deportivas integrantes desta federación e á Secretaría Xeral para o Deporte.

Artigo 8. Electores e elixibles

1. Poderán ser electores e elixibles:

a) No caso dos estamentos constituídos por persoas físicas (deportistas, adestradores e árbitros/xuíces) os que reúnan os seguintes requisitos:

- Ser maior de idade á data da convocatoria das eleccións.
- Ter licenza federativa en vigor e tela tido na tempada deportiva anterior á da data de convocatoria de eleccións.
- Ter participado nun mínimo de unha competición oficial na tempada deportiva anterior.
- No estamento de árbitros/xuíces ter a categoría de territorial.
- No estamento de adestradores, ter a titulación de adestrador auxiliar.

b) No caso do estamento de clubs: aqueles clubs, que estean inscritos, no ano da convocatoria das eleccións, na federación e no Rexistro de asociacións deportivas e deportistas de Galicia e teñan participado en competicións deportivas. A estes efectos e, con carácter mínimo, deberán de ter participado en catro competicións entre o ano de convocatoria das eleccións e os dous anos inmediatamente anteriores a aquel, e necesariamente unha delas no ano da convocatoria das eleccións.

2. Aos efectos deste artigo entenderase como competición deportiva, aquela que estivera reflectida nos correspondentes calendarios oficiais aprobados pola Asemblea xeral.

3. Os membros da federación que pertencen a dous ou mais estamentos no censo provisional, deberán optar por un deles, mediante escrito ante a xunta electoral que deberá cursarse no período de reclamacións ao censo. Os criterios para identificar os electores nun único estamento, no caso de non existir a proposta individual, serán a súa inclusión na modalidade principal (con maior número de licenzas)

Artigo 9. Composición da Asemblea Xeral

1. O número de membros da asemblea xeral será de ---, en aplicación do artigo 10, do presente regulamento

electoral. O Presidente da Federación desempeñará a Presidencia da Asemblea Xeral.

2. Os seus membros serán elixidos cada catro anos mediante sufraxio libre, igual, directo e secreto, salvo a singularidade prevista para o estamento de clubs, por e entre os compoñentes de cada estamento de conformidade co número e proporcións de representación que se establecen no presente regulamento.

3. Na asemblea xeral deberán estar representados todos os estamentos recoñecidos nos estatutos e integrados na federación e, cando menos, os clubs deportivos, os deportistas, os adestradores e os árbitros/xuíces.

4. No estamento de clubs haberá membros natos e membros electos.

5. A representación dos clubs corresponde ao seu presidente ou persoa que conforme estatutos lle corresponda. Esta representación acreditarase fidedignamente mediante certificación da inscrición do Rexistro de asociacións deportivas e deportistas de Galicia na que figure expresamente os representantes legais da entidade.

6. Non cabe representación das persoas físicas.

7. Ningún membro da asemblea poderá desempeñar unha dobre representación nesta.

8. A Federación Galega de Natación axustarase, no posible, nas súas actuacións ás recomendacións feitas pola Lei 7/2004, do 16 de xullo, galega para a igualdade de mulleres e homes (DOG nº 149, do 3 de agosto).

Artigo 10. Proporcionalidade na composición da Asemblea xeral

1. A porcentaxe de cada estamento é:

- Representantes de clubs: 70 %
- Representantes de deportistas: 20 %
- Representantes de adestradores: 5 %
- Representantes de xuíces: 5 %

2. A representación mínima do estamento de clubs na Asemblea Xeral da Federación Galega de Natación deberá ser do 50% do censo definitivo de clubs, incluíndo os membros natos.

En calquera caso todos os clubs deberán necesariamente cumprir os requisitos que para eles se establece no artigo 8 deste regulamento.

3. As porcentaxes xerais atribuídas a cada estamento son distribuídas, entre as delegacións provinciais, da seguinte maneira:

	A Coruña	Lugo	Ourense	Pontevedra	TOTAL
Clubs					
Deportistas					
Adestradores					
Árbitros					
Total:					

4. Cando o número de candidatos de calquera estamento coincida ou sexa inferior ao número de membros que hai que elixir non será necesaria a celebración de eleccións polo que a ese estamento se refire, dando continuidade ao procedemento electoral.

Non obstante, no caso de que nalgún estamento da asemblea houbera máis dun 20% de vacantes, unha vez terminado o proceso electoral e no prazo máximo de 3 meses, o presidente procederá á convocatoria parcial de eleccións para cubrir as vacantes, sen que esta nova convocatoria parcial afecte aos xa elixidos.

Artigo 11. Membros natos da Asemblea Xeral polo estamento de clubs

Serán membros natos, unicamente para o estamento de clubs e para a especialidade principal sen necesidade de someterse a votación conforme o establecido na Orde do 8 de setembro de 2010, aqueles clubs segundo o

seguinte baremo:

- Aqueles cinco (5) que contén cun maior número de licenzas (agás as de escola) así como outros cinco (5) que teñan participado nun maior número de competicións oficiais. Para a determinación dos membros natos pola participación en competicións oficiais, valoraranse tanto o número de competicións en que se participa como o número de deportistas participantes.

No caso de empate nalgunha das categorías anteriores, será membro nato aquel club que conte con máis méritos na outra categoría. No caso de proseguir o empate, este resolverase favorablemente para o club con máis antigüidade na súa filiación á Federación.

Estes datos referiranse ao ano inmediatamente anterior ao da convocatoria de eleccións.

No caso de que un club teña méritos para obter representación na asemblea por ámbalas categorías, a representación resultante será cuberta polos clubs candidatos á asemblea segundo o procedemento ordinario de elección no estatuto de clubs.

Conforme o anterior baremo, son membros natos da asemblea os seguintes clubs:

Por maior número de licenzas	Por maior número de actuacións
1. Real Club Náutico de Vigo	● Club Natación Galaico
2. Club Natación Portamiñá Lugo	● Club Natación Coruña
3. Club Marina Ferrol	● Club Natación Vigo Rías Baixas
4. Club Natación Ferrol	● Club Natación Liceo
5. Club Natación Coruña	● Club Natación Pabellón Ourense

Artigo 12. Candidatos a membros electos da Asemblea xeral

1. Poderá ser candidato a membro da asemblea xeral toda persoa física ou xurídica incluída no censo definitivo que o solicite persoalmente, por correo certificado ou por calquera outro medio que acredite fidedignamente en dereito a dita solicitude, ante a xunta electoral. Para a solicitude establécese un prazo de 3 días hábiles a contar dende a publicación do censo definitivo.

2. Unha vez presentadas as candidaturas, a xunta electoral proclamará a lista provisional de candidatos facéndoa pública na páxina web www.fegan.org. Haberá un prazo de 2 días hábiles, para a presentación de posibles reclamacións ante a Xunta electoral.

3. Unha vez resoltas as posibles reclamacións si as houbera, procederase á proclamación definitiva de candidatos.

Artigo 13. Sistema de votación a membros da Asemblea xeral

1. A votación a membros da asemblea realizarase en urnas separadas por estamentos. A votación desenvolverase sen interrupcións durante o horario de 16:00 a 20:00 h. Soamente por causa de forza maior poderán non iniciarse ou interromperse as votacións. En caso de suspensión da votación non se terán en conta os votos emitidos nin se procederá ao seu escrutinio. Neste caso, a xunta electoral fixará unha data para a nova votación.

2. O dereito de votar será acreditado pola inscrición no censo electoral definitivo. Para a súa identificación, o elector deberá presentar documento acreditativo da súa personalidade (DNI, pasaporte, tarxeta de residencia ou permiso de conducir con fotografía do titular). No caso das persoas xurídicas a representación corresponde ao seu presidente ou persoa que conforme estatutos lle corresponda, debéndose acreditar fidedignamente a dita representación mediante certificación da inscrición do Rexistro de asociacións deportivas e deportistas de Galicia na que figure expresamente os representantes legais da entidade.

Se un membro electo da Asemblea perdere a condición pola que foi elixido, causará baixa automaticamente naquela, procedéndose á súa substitución da seguinte forma:

As vacantes que se produzan na Asemblea antes das seguintes eleccións xerais á mesma, serán cubertas polos seguintes candidatos máis votados.

Os elixidos para cubrir as vacantes ás que se refire o parágrafo anterior, ostentarán o cargo polo tempo que falte ata as vindeiras Eleccións Xerais á Asemblea.

No suposto de que non existan candidatos máis votados, sempre e cando falte máis dun ano para as seguintes eleccións xerais, procederase á realización dunhas eleccións sectoriais nos estamentos de que se trate. Para os efectos, a Xunta Directiva convocará ditas eleccións na forma e condicións previstas nos Estatutos e Regulamento Xeral da FEGAN.

Artigo 14. Voto por correo

1. Unicamente se admitirá o voto por correo nas votacións para membros da Asemblea naqueles estamentos integrados por persoas físicas.

2. O exercicio do voto por correo haberá de ser solicitado polo interesado á xunta electoral, dende a data da convocatoria das eleccións ata 2 días hábiles despois da publicación do censo definitivo. Esta solicitude deberá facerse persoalmente, mediante correo certificado, burofax, ou por calquera outro medio validamente admitido en dereito que deixe constancia da solicitude.

3. Recibida pola xunta electoral a solicitude referida no punto anterior, comprobará a inscrición no censo definitivo do solicitante, realizando no caso de estar inscrito a anotación correspondente no censo e estendendo un certificado de autorización do voto por correo.

O certificado ao que se refire o parágrafo anterior deberá reflectir o nome do elector, o estamento polo que se solicita o exercicio do voto, así como un espazo en branco que deberá ser asinado polo elector previamente ao envío do voto á Secretaría Xeral para o Deporte.

A xunta electoral deberá remitir este certificado dentro dos 2 días hábiles seguintes á proclamación definitiva dos candidatos, remitíndollo aos solicitantes por correo certificado urxente e con acuse de recibo á dirección postal sinalada polo interesado na súa solicitude. Igualmente enviaráselle unha papeleta de votación en branco e o sobre de votación oficiais, xunto coa relación definitiva de todas as candidaturas presentadas ordenadas alfabeticamente.

A listaxe de persoas autorizadas para o exercicio do voto por correo deberase remitir á Secretaría xeral para o deporte, publicándose asemade na páxina web www.fegan.org

4. O elector introducirá a papeleta de voto no sobre da votación e pecharao. Inclúirá este sobre de votación, xunto ao certificado emitido pola xunta electoral no que se autoriza o voto por correo, asinado polo emisor do voto e a copia do DNI, nun sobre de maior tamaño que os anteriores que remitirá á Secretaría xeral para o deporte para a súa custodia, por correo certificado urxente, consignándose no anverso e reverso do mesmo os seguintes datos:

Anverso:

Secretaría xeral para o deporte

Estadio Multiusos de San Lázaro, porta 4

15781 Santiago de Compostela (A Coruña)

Eleccións á Asemblea Xeral da Federación Galega de Natación

Reverso:

Nome e apelidos do remitente

Estamento de

Modalidade ou especialidade de

5. A presentación dos votos nas Oficinas de Correos deberá realizarse con 6 días hábiles de antelación á data de celebración das eleccións, mediante envío por correo certificado urxente, e non serán admitidos os sobres depositados con data posterior. A Secretaría Xeral para o Deporte custodiará os votos emitidos, que serán postos a disposición da mesa electoral o día da votación, xunto cunha relación nominal dos mesmos, a fin de que, con posterioridade ao peche da votación presencial os membros da Mesa electoral poidan abrílos e, tras comprobar a súa regularidade, depositar cada voto na urna correspondente para incorporalo ao escrutinio.

6. Prevalecerá o voto persoal sobre o voto emitido por correo no caso de concorrencia de ambos.

Artigo 15. Presentación de candidaturas a presidente

1. No prazo de 2 días hábiles dende a proclamación definitiva de membros da Asemblea xeral, poderá presentar candidatura a presidente da federación calquera persoa física **sen que teña que ser membro da asemblea xeral**, que teña a condición política de galego (conforme ao establecido polo artigo 3.1. da Lei 1/1981, do 6 de abril, Estatuto de Autonomía de Galicia), maior de idade, en pleno uso dos seus dereitos civís, que non incorrese en ningunha sanción deportiva que o inhabilite e que non estea inhabilitado para o desempeño dun cargo público por sentenza xudicial firme. A persoa que resulte elixida como presidente terá que cesar en todo tipo de actividades técnicas e directivas no deporte específico e no ámbito territorial da federación galega correspondente.

Se algún membro da comisión xestora presentase a súa candidatura á presidencia, deberá cesar naquela.

O presidente saínte da federación será membro da nova asemblea xeral. Esta condición perderase nos casos de non presentar candidatura á presidencia ou, de téndoa presentado, non resultara elixido.

2. A presentación de candidaturas farase na sede oficial da federación, mediante escrito dirixido á xunta electoral, facendo constar a condición de membro de pleno dereito da asemblea xeral.

3. Finalizado o prazo de presentación de candidaturas, a xunta electoral exporá a listaxe provisional de candidatos a presidente no taboleiro de anuncios da federación así como na súa páxina web www.fegan.org. Pódense presentar impugnacións a esta no prazo de 2 días hábiles. As impugnacións serán resoltas pola xunta electoral no prazo de 1 día hábil.

A xunta electoral publicará no día seguinte hábil, seguindo os medios reflectidos no punto anterior, a lista definitiva de candidatos á presidencia.

Artigo 16. Elección do presidente

1. No día e hora fixados na convocatoria correspondente, constituirase a Asemblea Xeral en primeira ou segunda convocatoria tendo como únicos puntos da orde do día a elección a Presidente e a membros da Comisión delegada. O Presidente da Federación será elixido mediante sufraxio libre, directo, igual e secreto polos membros da asemblea xeral presentes no momento da elección.

2. Na votación á elección de presidente non se admitirá o voto por correo nin a delegación de voto. A representación dos clubs realizarase conforme o establecido no artigo 9 parágrafo quinto, non admitíndose que unha persoa ostente a representación de mais dun club.

3. Comezada a sesión e constituída a mesa electoral, o presidente presentará os candidatos. iniciando, de seguido, o proceso de votación.

4. Os candidatos poderán expoñer os seus programas si así o desexan, procedéndose posteriormente á votación en urna para a elección do presidente, que será secreta.

5. A Xunta Electoral determinará o modelo de papeleta. Cada membro da Asemblea só poderá votar a un candidato.

6. O proceso de votación está formado por un máximo de tres votacións.

a. Na primeira votación son elixibles todos os candidatos da listaxe definitiva. Aqueles que obteñan un mínimo do 10% dos votos dos membros presentes, pasarán á seguinte votación. No suposto en que ningún candidato acade o 10% dos votos, pasarán á seguinte votación aqueles dous candidatos que contén cun maior número de votos. No suposto en que soamente sexa un candidato o que obteña o 10% dos votos, pasará tamén á seguinte votación o seguinte candidato en número de votos. De acadarse por algún candidato a maioría absoluta dos votos, nesa primeira votación, será proclamado Presidente.

b. Na segunda votación soamente serán elixibles aqueles que, como xa está exposto e coas excepcións contempladas, obtiveran a lo menos o 10% dos votos dos membros presentes. Será elixido presidente o candidato que nesta fase obteña a maioría absoluta dos votos.

c. No caso de que na votación anterior ningún candidato obteña a maioría absoluta, procederase a unha nova votación entre os dous máis votados o mesmo día, resultando elixido o que obteña maioría de votos.

7. Terminada cada unha das votacións realizadas, a mesa electoral procederá á contaxe de votos e levantará a oportuna acta.

8. No caso de existir soamente dous candidatos, resultará elixido o que obteña a maioría simple dos votos. No caso de empate procederase a unha nova votación media hora máis tarde.

9. No caso de que se presentase un só candidato, non se efectuará votación.

10. Se non se presentase ningunha candidatura ou non fose válida ningunha das presentadas, a comisión xestora administrará a federación e convocará e realizará novas eleccións a presidente no prazo máximo de 3 meses.

11. Rematada a elección, a acta do resultado desta será remitida á xunta electoral. Transcorridos os prazos de presentación de posibles recursos e resoltos estes, a xunta electoral proclamará presidente ao candidato máis votado e comunicará os resultados á Secretaría xeral para o deporte no prazo máximo de 10 días.

12. Unha vez proclamado definitivamente o novo presidente, a comisión xestora deberá poñer a disposición deste no prazo máximo de 5 días hábiles, contados dende a proclamación definitiva, toda a documentación relativa á federación, levantando acta da documentación entregada e remitíndolle copia desta á Secretaría xeral para o deporte.

13. Tras a súa proclamación o presidente designará os demais órganos e comités de acordo cos estatutos da federación, debendo comunicarlle a súa composición á Secretaría xeral para o deporte no prazo máximo de 10 días hábiles, dende o seu nomeamento.

Artigo 17. Elección de membros da comisión delegada

A comisión delegada será elixida entre e pola asemblea xeral mediante sufraxio libre, igual, directo e secreto entre os seus membros. O seu mandato coincidirá co da asemblea xeral. Será presidida polo presidente da federación como membro nato desta.

O número de membros da comisión delegada será de 10. Ademais do Presidente da FEGAN, estará formada por 6 representantes do estamento de clubs, 2 representantes do estamento de deportistas, e 1 representante dos estamentos de adestradores e xuíces e árbitros.

O procedemento para a súa elección será o seguinte:

1.- As candidaturas a membros da Comisión Delegada se relacionarán, por orden alfabético, nos correspondentes modelos oficiais de papeletas, que se facilitarán aos electores na propia sesión da Asemblea Xeral.

2.- Os electores exercerán o seu dereito de sufraxio polo procedemento de antepor un signo ao nome de cada un dos candidatos que desexe votar.

3.- No caso de que un elector no votase candidatura algunha ou o fixese en número superior ao que corresponda, a papeleta será considerada nula

4.- O Presidente da Mesa, efectuará un novo chamamento dos membros da Asemblea Xeral, en esta ocasión por estamentos.

5.- Rematada a votación por cada estamento se procederá ao escrutinio dos votos, baixo a presidencia da Mesa Electoral, e coa presenza, dos interventores, se os houber.

RESOLUCIÓN DE EMPATES ENTRE CANDIDATOS

1.- Concluído o escrutinio, os que houberen resultado elixidos serán proclamados, pola Mesa, membros da Comisión Delegada da Asemblea Xeral.

2.- En caso de que se producira empate entre dous ou máis candidatos, se efectuaría unha segunda votación entre os candidatos que houberan empatado, resultando elixido o candidato que obtivese a maioría simple.

3.- Si persistise o empate, se celebraría un terceiro desempate entre os mesmos candidatos, sendo nomeado membro da Comisión Delegada o candidato que obtivese a maioría simple. No caso de que despois do terceiro desempate, este non se resolvese, aplicaríanse as seguintes regras:

a) Sendo entre Clubs, resultará elixido membro da Comisión Delegada, o de fundación máis antiga.

b) Sendo entre Deportistas, Árbitros ou Adestradores, resultará elixido o de maior idade.

Artigo 18. Recurso ante a Xunta electoral

O coñecemento de tódolos recursos que se poidan formular na materia electoral corresponde á xunta electoral, sendo tódalas súas resolucións recorribles ante o Comité Galego de Xustiza Deportiva. Están lexitimados para interpoñer recursos os representantes das candidaturas ou as persoas e entidades debidamente afectadas polos acordos da xunta electoral.

Os recursos ante a Xunta electoral serán presentados, persoalmente ou por calquera medio que acredite fidedignamente en dereito a presentación do escrito (burofax, correo certificado, telegrama...), na sede central federativa mediante escrito dirixido ao presidente da Xunta electoral.

Os prazos para a presentación destes recursos, así como os de resolución da Xunta electoral serán de 2 días hábiles, salvo nos casos nos que no presente regulamento ou na Orde do 8 de setembro de 2010 se establezan outros distintos.

Artigo 19. Recurso ante o Comité Galego de Xustiza Deportiva

1. Contra os acordos e resolucións das xuntas electorais procederá recurso electoral ante o Comité Galego de Xustiza Deportiva, poñendo fin, as resolucións deste, á vía administrativa.

Están lexitimados para interpoñer este recurso os representantes das candidaturas ou as persoas ou entidades debidamente afectadas polos acordos da xunta electoral.

2. Os prazos para formalizaren estes recursos serán de 2 días hábiles dende o seguinte ao da notificación do acordo expreso da correspondente xunta electoral ou do seguinte a aquel en que rematou o prazo de resolución de reclamacións segundo o calendario electoral.

3. O escrito de interposición do recurso deberá expresar:

- Nome, DNI e domicilio da persoa física ou denominación e enderezo social dos entes asociativos interesados, incluíndo neste último caso o nome do seu representante legal.
- Se é o caso, o nome, DNI e enderezo do representante do interesado, podendo acreditar a súa representación, ademais de polos medios legais procedentes, a través de comparecencia ante a Secretaría do Comité Galego de Xustiza Deportiva.
- Lexitimación para interpoñer o recurso
- O acto que se recorre e a razón da súa impugnación.
- As consideracións de feito e de dereito nas que baseen as súas pretensións, así como as propostas de proba que ofrezan en relación con aquelas.

- As pretensións que deduzan de tales consideracións.
- Lugar, data e sinatura.

ANEXO I. CALENDARIO ELECTORAL

26 Setembro: Asemblea Extraordinaria

29 Setembro: Presentación Regulamento Electoral

10 Outubro: Comunicación da convocatoria de eleccións a Clubs e SXD

17 Outubro: Convocatoria de eleccións

Publicación Regulamento Electoral

Publicación Calendario Electoral

Publicación Censo Electoral PROV

Inicio prazo solicitude voto por correo

29 Outubro: Fin prazo reclamación ao censo electoral

31 Outubro: Fin prazo de resolución das reclamacións ao censo

Publicación Censo DEF

Sorteo composición mesas electorais

Inicio prazo de presentación de candidaturas à Asemblea

3 Novembro: Fin do prazo de petición de voto por correo

4 Novembro: Fin prazo de presentación candidatos à Asemblea

Proclamación PROV de candidatos à Asemblea

Inicio prazo de reclamación a candidaturas à Asemblea

7 Novembro: Fin prazo de reclamación a candidaturas à Asemblea

8 Novembro: Fin prazo de resolución de reclamacións a candidaturas à Asemblea

Proclamación DEF de candidaturas á Asemblea

12 Novembro: Fin do prazo para remitir documentación do voto por correo

21 Novembro: Fin prazo para depositar o voto en Correos

28 Novembro: Votación a membros da Asemblea

Escrutinio

Proclamación de resultados PROV a membros da Asemblea

29 Novembro: Inicio prazo de reclamación a membros da Asemblea

29 Novembro: Fin prazo de reclamación a membros da Asemblea

2 Decembro: Resolución reclamacións a membros da Asemblea

Proclamación DEF resultados a membros da Asemblea

3 Decembro: Inicio de prazo de presentación de candidaturas a Presidente e membros da Comisión Delegada

4 Decembro: Fin de prazo de presentación de candidaturas a Presidente e membros da Comisión Delegada

Proclamación PROV de candidatos a Presidente e Comisión Delegada

5 Decembro: Inicio prazo de reclamación de candidatos a Presidente e Comisión Delegada

9 Decembro: Fin prazo de reclamación de candidatos a Presidente e Comisión Delegada

Proclamación DEF de candidatos a Presidente e membros da Comisión Delegada

10 Decembro: Resolución reclamacións a candidaturas a Presidente e Comisión Delegada

11 Decembro: Proclamación DEF candidatos a Presidente e Comisión Delegada

12 Decembro: Votación a Presidente e membros da Comisión Delegada

Proclamación PROV de Presidente e membros da Comisión Delegada

13 Decembro: Inicio prazo de reclamacións a Presidente e membros da Comisión Delegada

15 Decembro: Fin prazo de reclamacións a Presidente e membros da Comisión Delegada

16 Decembro: Resolución reclamacións a Presidente e membros da Comisión Delegada

Proclamación DEF de Presidente e membros da Comisión Delegada.

ANEXO II. MODELOS DE SOBRES E PAPELETAS

ANEXO III. CENSOS